



REPUBLIKA E SHQIPËRISË
AUTORITETI I KONKURENCËS
KOMISIONI I KONKURENCËS

VENDIM

Nr. 875, Datë 08.04.2022

“MBI AUTORIZIMIN E PËRQENDRIMIT TË REALIZUAR NËPËRMJET PËRFTIMIT
TË KONTROLLIT TË PËRBASHKËT TË SHOQËRISË MOONEY GROUP S.P.A. NGA
SHOQËRITË BANKA 5 S.P.A. DHE ENEL X S.R.L.”

Komisioni i Konkurrencës me pjesëmarrjen e:

Z.	Denar BIBA	Kryetar
Znj.	Leida MATJA	Zv/Kryetar
Znj.	Adriana BERBERI	Anëtar
Znj.	Rezana KONOMI	Anëtar

Në mbledhjen e tij të datës 08.04.2022, shqyrtoi çështjen me:

Objekti: Autorizimi i përqendrimit të realizuar nëpërmjet përfimit të kontrollit të shoqërisë Mooney Group S.p.A. nga shoqëritë Banka 5 S.p.A. dhe Enel X S.r.l.

Baza Ligjore: Nenet 2, 10-12, neni 24, germa d, dhe nenet 53-64 të ligjit nr. 9121, datë 28.07.2003 “Për mbrojtjen e konkurrencës”; Rregullorja “Për zbatimin e procedurave të përqendrimit të ndërmarrjeve”; Udhëzimi “Për formën e njoftimit të përqendrimit” dhe Formulari i njoftimit të përqendrimit.

Komisioni i Konkurrencës, pas shqyrtimit të relacionit të Sekretarit të Përgjithshëm si dhe raportit të Drejtorisë së Analizës dhe Metodologjisë së Tregjeve, mbi njoftimin e përqendrimit të realizuar nëpërmjet përfimit të kontrollit të shoqërisë Mooney Group S.p.A. nga shoqëritë Banka 5 S.p.A. dhe Enel X S.r.l.

VËREN SE :

I. Palët në transaksioni dhe procedura

Pranë Autoritetit të Konkurrencës është depozituar njoftimi mbi përfimit të kontrollit të shoqërisë Mooney Group S.p.A. nga shoqëritë Banka 5 S.p.A. dhe Enel X S.r.l.

Referuar “Marrëveshje shitje dhe transferimi aksionesh në lidhje me Mooney Group S.p.A.”, dhe “Marrëveshjes Kuadër”, të nënshkruara më datë 23 dhjetor 2021, palët në marrëveshje janë:

Pala Blerëse:

Blerësi 1: Banka 5 S.p.A. është një shoqëri aksionare e organizuar dhe ekzistuese sipas ligjeve të Italisë me objekt aktiviteti ofrimin e shërbimeve bankare, si dhe shërbime grumbullimi dhe pagese për shitësit monopol, si p.sh. tregtarët e duhanit etj. Banka 5 S.p.A. zotëron 30% të kapitalit të shoqërisë Mooney Group S.p.A.

Banka 5 S.p.A. i përket grupit të shoqërive të drejtuara nga Intesa Sanpaolo S.p.A, e cila është shoqëria mëmë e Grupit Intesa Sanpaolo, një prej grupeve bankare kryesore italiane. Grupi Intesa Sanpaolo është i pranishëm në Shqipëri, nëpërmjet filialit të zotëruar tërësisht prej tij, Intesa Sanpaolo Bank Albania ShA.

Intesa Sanpaolo Bank Albania SHA, është një shoqëri aksionare e themeluar sipas legjislacionit Shqiptar me objekt aktiviteti: veprimtari bankare, veprimtari financiare dhe veprimtarinë e kasave të sigurimit, pas miratimit paraprak të Bankës së Shqipërisë, veprimtari të lidhura me transaksionet e titujve, vetëm pasi të jetë licencuar nga AMF dhe veprimtarinë e ndërmjetësimit në sigurime dhe risigurime.

Blerësi 2: Enel X S.r.l. është një shoqëri me përgjegjësi të kufizuar, e organizuar dhe ekzistuese sipas ligjeve të Italisë me objekt aktiviteti fokusimin në zhvillimin e produkteve inovative dhe zgjidhjeve dixhitale në fushat ku energjia tregon potencialin më të madh të transformimit, p.sh., qytetet inteligjente dhe lëvizshmëria elektronike. I gjithë kapitali aksionar i shoqërisë Enel X S.r.l. zotërohet nga shoqëria Enel S.p.A. Enel S.p.A. është shoqëria mëmë e Grupit Enel, i cili është aktiv në mbarë botën në sektorin e energjisë dhe gazit natyror.

[...]

Pala Shitëse: Schumann Investments S.A është një shoqëri aksionare, e organizuar dhe ekzistuese sipas ligjeve të Dukatit të Madh të Luksemburgut. Shoqëria Schuman Investments S.A zotëron plotësisht kapitalin aksionar të shoqërisë SG2 S.p.A, e cila është zotëruese e 70% të kapitalit aksionar të shoqërisë target, Mooney Group S.p.A.

Target: Mooney Group S.p.A. është një shoqëri aksionare, e themeluar në bazë të ligjeve të Italisë me objekt aktiviteti: ofrimin e shërbimeve nëpërmjet një rrjeti pikash shitjeje të ndërlidhura në Itali (p.sh., shitës duhani, bare dhe standat e gazetave) dhe nëpërmjet platformave dixhitale. Mooney Group S.p.A. gjithashtu ofron shërbime të biletave dixhitale të transportit në Itali përmes platformës MyCicero.

Mooney Group S.p.A. nuk ka filiale, aktivitete dhe nuk gjeneron të ardhura në Shqipëri.

II. Përqendrimi

Më datë 23 Dhjetor 2021, shoqëritë Schuman Investmen S.A, Enel X S.r.l. dhe Banka 5 S.p.A., kanë nënshkruar dokumentin “Marrëveshje shitje dhe transferimi aksionesh në lidhje me Mooney Group S.p.A.” dhe në të njëjtën datë shoqëritë Enel X S.r.l., Banka 5 S.p.A., Enel S.p.A. dhe Intesa Sanpaolo S.p.A. kanë nënshkruar dokumentin “Marrëveshje Kuadër”.

Referuar “Marrëveshjes së shitjes dhe transferimit të aksioneve në lidhje me Mooney Group S.p.A.”, Schuman Investmen S.A do t’i shesë dhe transferojë tek shoqëria Enel X S.r.l. 50% të

kapitalit të shoqërisë Mooney Group S.p.A. Gjithashtu Schuman Investments S.A do t'i shesë dhe transferojë tek Banka 5 S.p.A. 20% të aksioneve të shoqërisë Mooney Group S.p.A.

Pas përfundimit të transaksionit të parë, kapitali aksionar i shoqërisë target Mooney Group S.p.A. do të kontrollohet bashkërisht nga shoqëritë Enel X S.r.l. në masën 50% dhe nga Banka 5 S.p.A. në masën 50%.

Referuar “Marrëveshjes Kuadër”, palët synojnë të rregullojnë detyrimet dhe angazhimet e tyre përkatëse, si dhe të rregullojnë disa aktivitete përgatitore dhe funksionale për zbatimin e transaksionit të përgjithshëm Mooney (transaksioni i parë dhe i dytë).

Bazuar në këtë marrëveshje, pas përfundimit të transaksionit të parë, do ta mbahet një takim i Bordit të Drejtorëve të Mooney Group S.p.A. për të vendosur për miratimin dhe nënshkrimin nga Enel X (si shitës) dhe Mooney Group S.p.A. (si blerës) të Marrëveshjes së Blerjes së aksioneve, në lidhje me blerjen nga Mooney Group S.p.A., të investimeve në kompanitë e synuara (transaksioni i dytë) dhe në përfundim të këtij transaksioni Mooney Group S.p.A. do të zotërojë 100% të kapitalit aksionar të shoqërive të mëposhtme: Enel X Financial Services S.r.l.; CityPoste Payment S.p.A.; Junia Insurance S.r.l. dhe PayTipper S.p.A..

Bazuar në Udhëzimin “Mbi kontrollin e përqendrimeve ndërmjet ndërmarrjeve”, pika 1.5.2 “Transaksionet e ndërvarura”, parashikohet se dy ose më shumë transaksione përbëjnë një përqendrim të vetëm, nëse ato janë unikë në natyrë. Me qëllim që të përcaktohet natyra unike e transaksionit, është e nevojshme që këto transaksione të jenë të ndërvarura, në mënyrë të tillë që një transaksion nuk do të ishte kryer pa tjetrin. Transaksioni i propozuar, i përgjithshëm, (transaksioni i parë dhe transaksioni i dytë), cilësohet si një transaksioni unitar, pasi këto transaksione janë të lidhura me njëra-tjetrën ligjërisht, janë të ndërvarura dhe janë të kryera nga palë të njëjta, Grupi Intesa Sanpaolo dhe Grupi Enel. Gjithashtu transaksioni i dytë nuk do të zbatohet derisa të përfundojë transaksioni i parë.

Transaksioni i propozuar konsiston në përfundimin e kontrollit të përbashkët të shoqërisë Mooney Group S.p.A. nga shoqëritë Banka 5 S.p.A. dhe Enel X S.r.l., i parashikuar në nenin 10 dhe referuar pasqyrave financiare të palëve, plotësohen kriteret e parashikuara në nenin 12 të ligjit nr. 9121 datë 28.07.2003 “Për mbrojtjen e konkurrencës”, si i tillë është objekt autorizimi nga Komisioni i Konkurrencës.

III. Vlerësimi i konkurrencës

Referuar nenit 3, pika 7, të ligjit nr. 9121, datë 28.07.2003 “Për mbrojtjen e konkurrencës”, si edhe Udhëzimit nr.76, datë 07.04.2008 “Për përcaktimin e tregut përkatës”, treg përkatës i produktit do të konsiderohet tregu i shërbimit të pagesave nëpërmjet rrjetit të pikave të shitjes, por duke qenë se transaksioni nuk do të ketë asnjë ndikim në tregun shqiptar si edhe duke iu referuar praktikave të Komisionit Evropian në çështje të ngjashme, tregu përkatës i produktit do të lihet i hapur.

Treg përkatës gjeografik do të konsiderohet territori i Republikës së Shqipërisë.

Transaksioni i propozuar është përftimi i kontrollit të përbashkët të shoqërisë Mooney Group S.p.A. nga shoqëria Banca 5 S.p.A. dhe shoqëria Enel X S.r.l., i klasifikuar si një përqendrim konglomerat.

Banca 5 S.p.A. është një nga bankat italiane që i përket Grupit Intesa Sanpaolo, i pranishëm në Shqipëri përmes filialit të zotëruar tërësisht prej tij Intesa Sanpaolo Bank Albania SHA.

Enel X S.r.l. është pjesë e grupit Enel i cili kryesohet nga shoqëria mëmë përfundimtare Enel S.p.A. Grupi Enel nuk ka filiale, aktivitet dhe nuk gjeneron të ardhura në Shqipëri.

Mooney Group S.p.A. është prezent ekskluzivisht në Itali dhe nuk ka filiale apo aktivitet në Shqipëri.

Përqendrimi nuk do të krijojë mbivendosje ose marrëdhënie të rrjedhës së sipërme apo të poshtme midis aktiviteteve të palëve në nivel kombëtar dhe për këto arsye, transaksioni i synuar nuk do të sjellë asnjë ndryshim dhe nuk do të ketë asnjë ndikim në tregun shqiptar.

PËR KËTO ARSYE:

Komisioni i Konkurrencës, në bazë të nenit 24, shkronja d dhe nenit 56 pika 1 të ligjit nr. 9121, datë 28.07.2003 “Për mbrojtjen e konkurrencës”,

VENDOSI:

1. Të autorizojë përqendrimin e realizuar nëpërmjet përfimit të kontrollit të përbashkët të shoqërisë Mooney Group S.p.A. nga shoqëria Banca 5 S.p.A. dhe shoqëria Enel X S.r.l
2. Ngarkohet Sekretari i Përgjithshëm për njoftimin e palëve dhe dërgimin e vendimit pasi të bëhen pagesat që parashikon rregullorja “Për caktimin e shpenzimeve për ndjekjen e procedurave pranë Autoritetit të Konkurrencës”.

Ky vendim hyn në fuqi menjëherë.

KOMISIONI I KONKURRENCËS